

# INUIT ATAQATIGIIT

## INATSISARTUNI



17. august 2012

UKA 2012/23

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Utoqqaat 65-it qaangerlugit ukioqalereersimasut pinngitsuugassaannngitsumik  
pitsaaliuineq siunertaralugu angerlarsimaffiinut pulaarneqartalernissaat  
suliniutigeqqullugu Nalakkersuisut peqquneqarnissaannik Inatsisartut  
aalajangiiffigisassaattut siunnersuut.**

(Inatsisartunut ilaasortaq Olga P. Berthelsen, Inuit Ataqatigiit)

### Tunngavilersuut

Nunatsinni utoqqaat amerliartorput. Utoqqaat amerliartornerat eqqumaffigeqqissaarneqartariaqarpoq, eqqumaffiginninnikkut utoqqaat inuiaqatigiinni suliaassanut assigiinngitsunut atorluarneqarsinnaaneri ineriartortinneqartuarsinnaammata.

Taassumap saniatigut utoqqaat, angerlarsimaffimmini najugaqartut malinnaaffigeqqissaarneqarnerisigut, inuttut naleqassusaat, peqqinnissakkut qanoq inissisimanerat malinnaaffigeqqissaarneqarsinnaavoq.

Akilerartarnermut Atugarissaarnermullu Ataatsimiisitaliap isumaliutissiissutaani, allaaserineqartut naapertorlugit ullumikkut inuit 65-t sinnerlugit ukioqalersimasut 3700-uupput naatsorsuutiginarlunilu 2040-p tungaanut, 9200 angullugit amerlassuseqalersimassasut.

Kisitsisit annertoorejussuupput taamaattumillu siunissaq ungasinnerusoq eqqarsaatigalugu, utoqqartatta inuiaqatigiinni qanoq pitsaanerpaamik, aammalu sivisunerpaamik inuiaqatigiinnut, iluaqutaasumik innuttaasunillu naligiissitsisumik aaqqiisinaanissarput pisariaqarpoq.

Taamatut iliuseqarsinnanissaq anguneqassappat pisariaqarpoq inuit utoqqalinersiuteqalersimasut, arlaannillu peqquteqartumik suliffeqarfinniikkunnaarsimasut malinnaaffiguarnissaat.

Imaassinnaavoq namminneq aalajangikkaminnik utoqqalinersiaqalerlutik inuulersimasut imaluunnit, arlaatigut peqqikkunnaarsimanertik peqqutigalugu angerlarsimaannalersimasut.

Inuit kikkulluunniit suliunnaarsimatillutik imaluunniit nappaateqalersimatillutik inuttut unittoorsinnaanerat qanillisarpoq. Assersuutigalugu imaassinnaavoq imminut mattunermik, kiserliulernermik kinguneqartumik inuuneqalersinnaasut, naggataatigut peqqiillinermik kinguneqartumik, taamaalillunilu inuiaqatigiinnut akulerussinnaanerat killeqalersinnaalluni.

Taassumap saniatigut utoqqaat, utoqqalinermini nalinginnaasumik allannguutaasartut, assersuutigalugu isigiarsunneq, tutsarluttuuneq, aap naqitsinerata allannguuteqarnera,

nerisaqarnek, timersorneq il.il. pillugit siunnersorneqartuarsinnaanerat, annertuumik pinaveersaartitsinermut iluaqutaasinnaanera ammaaffigineqassaaq.

Taamaattumik siunnersuutigaara; Utoqqaat 65-it qaangerlugit ukioqalereersimasut pinngitsuugassaannngitsumik pitsaaliuineq siunertaralugu angerlarsimaffiitut pulaarneqartalermissaat suliniutigeqqullugu Nalakkersuisut peqquneqarnissaannik Inatsisartut aalajangiiffigisassaattut siunnersuut.

**Pisortanut aningaasatigut allaffissornikkullu kingunerisassat:**

Piffissaq sivikinnerusoq eqqarsaatigalugu, kommuuninut aningaasartuutaasinnaanera naatsorsuutigineqatariaqarpoq, pisariaqassappat sulisunik pisariaqartitsisinnaaneq ilimanarsinnaammatt. Piffissaq ungasinnerusoq eqqarsaatigalugu, kommuuninut aammalumi peqqinnissaqarfik eqqarsaatigalugit, inuiaqatigiinnut aningaasartuutitigut sipaartoqarsinnaanera naatsorsuutigineqatariaqarpoq.

**Namminersorluni inuussutissarsiuteqarnermut aningaasatigut allaffissornikkullu kingunerisassat:**

Utoqqaat suliffeqarfiit iluini misilittagallit, suliffeqarfinni namminersortuni siunnersuisutut, pikkorissaasartut atorneqarsinnaanerat ammaanpeqarsinnaassaaq, taamaalippallu suliffeqarfinnut namminersortunut aningaasartuutaasinnaanissaat naatsorsuutigineqatariaqarpoq.

**Innuttaasunut aningaasatigut allaffissornikkullu kingunerisassat:**

Akilerartarnermut Atugarissaarnermullu Ataatsimiititaliap, 2008 tunngavigalugu naatsorsorsimasaat tunngavigissaganni, utoqqalinersiutinut peqqinnissaqarfimmullu ukiumut 700 mio,- kr. aningaasartuutaasarput. Taakkua ikilisinneqarsinnaapput utoqqaat pisinnaasaat tunngavigalugit, suliffeqarfinni atorluarneqarsinnaappata.

Allaffissornikkut kingunerisinnaavaa kommuunini allaffissornerup annertusiallannera, utoqqaat pulaarneqareernermikkut qanoq inneri nalunaarsorneqartartussaammata.